



Komunikadu Imprensa
Munisípiu Ermera
01 Marsu 2024

**JSMP no Estrutura Suku Delesu asina Nota Entendimentu
ba Programa Apoiu Seguransa Komunitáriu (PASK)**

Iha 26 Feveireiru 2024, JSMP kontinua haluan Programa Apoiu Seguransa Komunitáriu (PASK) liuhosi asina Nota Entendimentu (MoU) ho Suku Delesu, Postu Administrativu Railaku, Munisípiu Ermera.

“JSMP agradese tebes ba xefe Suku Delesu ho ninia estrutura tomak ne’ebé simu ona prezensa JSMP nian iha Suku Delesu hodi bele serbisu hamutuk durante fulan neen (6), espera katak ho serbisu hamutuk ne’e bele tulun komunidadade sira atu asesu ba justisa,” dehan Sra. Flora Soriano Menezes, Coordenadora Unidade Peskizadór Legál no Unidade Treinamentu no Advokasia JSMP.

Enkuantu, Administradora Postu Administrativu Railaku, Sra. Micaela dos Santos Soares, haktuir katak agradese tebes ba JSMP tanba antes ne’e serbisu hamutuk ona ho Suku Samalete no haluan tan liras ba Suku Lihu no Suku Delesu. Espera katak iha futuru programa ne’e bele haluan tan ba suku sira seluk tanba hosi serbisu hamutuk ne’e iha duni rezultasu pozitivu. Ita bele haree hosi Suku Samalete ne’ebé antes ne’e iha problema barak, maibé depoisde serbisu hamutuk ne’e ita haree katak problema komesa menus, nune’e konsidera JSMP ninia prezensa ne’e importante tebes. Tanba ne’e, husu ba estrutura suku hotu atu kolabora di’ak ho JSMP ba implementasaun programa ne’e, nune’e bele atinji duni saida mak sai hanesan preokupasaun komunidadade sira nian iha suku ne’e.

Iha parte seluk, Xefe Suku Delesu, Sr. Ananias Martins Huno, iha nia intervensaun hato’o agradese bo’ot tebes ba JSMP tanba bele hili Suku Delesu hodi serbisu hamutuk. Estrutura tomak hosi suku prontu atu kolabora tanba konsidera programa ne’e importante atu fasilita komunidadade sira bele asesu informasaun ba sira nia kazu no fahe informasaun ba komunidadade sira kona-ba lei no oinsa maka bele hadia regra Tara-Bandu sira ne’ebé la kondis ho lei formál sira. Alende ne’e, ajuda estrutura suku bele rezolve problema disputa sira iha suku laran.

Komandante Polísia Eskuadra Railako, Sr. Moises de Deus Maia, haktuir katak PNTL Eskuarda Railaku prontu apoiu no kolabora ho JSMP hodi bele implementa programa JSMP nian iha suku sira tanba konsidera programa ne’e importante tebes no bele ona ajuda polísia nia knaar balun ne’ebé tuir loloos polísia maka tenke halo, no saida mak durante ne’e akontese mak estrutura suku sira seidauk bele halo separasaun ho di’ak ba krime públiku no krime semi públiku no kazu ne’ebé mak bele rezolve deit iha suku no kazu

ne'ebé mak mezmu rezolve ona iha suku maibé ninia prosesu tenke to'o iha tribunál, nune'e espera katak ho prezensa JSMP nian bele tulun estrutura suku sira atu identifika kazu sira ho di'ak no mós liuhosi programa ida ne'e JSMP hanesan tilun no matan ba comunidade sira bainhira sira presiza informasaun ruma kona-ba oinsa maka atu asesu ba justisa formál.

Programa ne'e ho nia objetivu mak atu tulun comunidade lokál sira no intervenente sira iha sistema justisa nasional hodi hadi'ak ligasaun entre nia sistema sira no mós hadi'ak justisa ida ne'ebé justu no ema hotu-hotu bele asesu iha nivel komunitáriu, ho atividade sira mak hanesan :

1. Observa prosesu rezolusaun disputa komunitáriu no hala'o peskiza lokál
2. Fornese informasaun hodi tulun halo revizaun ba iha Regra Tara-bandu
3. Fahe informasaun kona-ba progresu kazu sira hosi polísia tribunál, prokuradoria ba iha suku sira tarjetu
4. Advokasia atu hadi'ak liután ligasaun comunidade sira ho justisa formal
5. Fahe informasaun kona-ba asesu ba sistema justisa formal.
6. Sei introduz *Case Log* ba konsellu suku sira no OPS kona-ba oinsa atu priense formulariu kazu sira.

MoU ne'e asina hosi Kordenadora Unidade Peskizadór Legál no Unidade Treinamentu no Advokasia, Sra. Flora Soriano Menezes no Xefe Suku Delesu, Sr. Ananias Martins Huno no akompaña hosi Administradora Postu Administrativu Railaku, Sra. Micaela dos Santos Soares, Komandante Polísia Eskuadra Railaku, Sr. Moises de Deus Maia. Seremónia ne'e partisipa hosi Xefe aldeia 2 (rua), Ofisiál Polísia Suku (OPS), delegadu/a, representante juventude feto no mane, representante Igreja, veteranus no comunidade balun hosi Suku Delesu.

Atividade ne'e, realiza hosi JSMP liuhosi Programa Apoiu Seguransa komunitária (PASK) tanba serbisu hamutuk ho The Asia Foundation (TAF) ne'ebé finansia hosi Embaixada Nova Zelândia iha Timor -Leste.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl